



Približiti se evropskom klubu, te na određen način „biti privilegovan“ i postati član tog kluba jeste jedan od strateških prioriteta Bosne i Hercegovine. Direkcija za evropske integracije Bosne i Hercegovine, kao stalno tijelo Vijeća ministara, ima zadatak da vodi i koordinira rad svih institucija u tom pravom smjeru, smjeru evropskih integracija.

S obzirom da je uspjeh procesa integriranja BiH u EU u velikoj mjeri ovisi, između ostalog, od stepena poznavanja i razumijevanja EU, njenog ustrojstva, institucija, politika i suštine samog procesa stabilizacije i pridruživanja, Direkcija veliku pažnju posvećuje promociji svojih aktivnosti, te aktivnosti svih organa vlasti koji aktivno sudjeluju u ovom procesu.

Veliko mi je zadovoljstvo predstaviti Pregled aktivnosti Direkcije za evropske integracije BiH 2003.-2006., i to baš u trenutku kada se Bosna i Hercegovina priprema za održavanje posljednje zvanične runde pregovora o Sporazumu o stabilizaciji i pridruživanju, te parafiranje i svečano potpisivanje istog. Ovaj Pregled jeste svojevrsna kruna rada uposlenih i ima za cilj da doprinese boljem razumjevanju procesa evropskih integracija, te s tim u vezi i ulozi institucija Bosne i Hercegovine na tom putu.

Priprema ove publikacije, kao i sve druge aktivnosti koje Bosna i Hercegovina i njene institucije provode na putu evropskih integracija jeste rezultat odgovornog, planiranog i predanog rada, kao i ispunjavanja obaveza prije svega prema Bosni i Hercegovini, ali i prema institucijama Evropske unije. Objavljivanjem ovakve publikacije i koordinacijom reformskih procesa, koji su potrebni kako bi smo imali stabilnu državu, s jedne strane pokušavamo da odgovorimo evropskim zahtjevima, dok se, s druge strane, već sada ozbiljno pripremamo za naredne faze procesa integriranja. Činom potpisivanja Sporazuma o stabilizaciji i pridruživanju, Bosna i Hercegovina će po prvi put zasnovati ugovorni odnos s Evropskom unijom, što samo po sebi implicira nove i veće izazove za koje moramo biti spremni.

Stoga želim istaći da su se institucije BiH, a samim tim i Direkcija za evropske integracije, tokom cijelog ovog procesa, od Mape puta, Studije izvodljivosti, preko ispunjavanja uslova iz 16 prioriternih oblasti, pa sve do započinjanja i budućeg zaključivanja pregovora o Sporazumu, razvijale i sazrijevale kako bi ostvarile svoju ulogu i postigle značajan napredak na putu evropskih integracija.

Možemo i trebamo biti ponosni postignutim, ali i svjesni da je pred nama još uvijek dug i težak put, put ka konačnom cilju – članstvu u EU kroz prihvatanje evropskih vrijednosti – mira, stabilnosti i ekonomskog napretka.

Osman Topčagić
direktor Direkcije za evropske integracije BiH